



**UPUTSTVO**  
**o dodjeli i prestanku mandata**

Sarajevo, april 2014. godine

Na osnovu člana 2.9 stav (1) tačka 2, a u vezi s članom 1.10 stav (3), 9.5, 9.6, 9.8 i 13.5 Izbornog zakona Bosne i Hercegovine („Službeni glasnik BiH“, broj: 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13 i 7/14) i članom 18. Poslovnika Centralne izborne komisije Bosne i Hercegovine („Službeni glasnik BiH“, br. 50/07, 33/09, 24/13 i 32/14), Centralna izborna komisija Bosne i Hercegovine je, na 19. sjednici održanoj 29.04.2014. godine, donijela

## **U P U T S T V O** **o dodjeli i prestanku mandata**

### **POGLAVLJE I. UVODNE NAPOMENE**

#### **Član 1.** **(Predmet)**

Ovim uputstvom se utvrđuje:

- a) način dodjele mandata (član 9.5, 9.6, 9.7 i 9.10 Izbornog zakona BiH),
- b) postupak žrijebanja (član 9.8 stav (1) Izbornog zakona BiH) i
- c) način prestanka i postupak utvrđivanja prestanka mandata izabranom članu organa vlasti prije isteka vremena na koje je izabran, na svim nivoima neposrednih i posrednih izbora u Bosni i Hercegovini obuhvaćenih Izbornim zakonom Bosne i Hercegovine (u daljnjem tekstu: Izborni zakon BiH) i postupak dodjele mandata sljedećem kvalificiranom kandidatu sa liste iste političke stranke (član 1.10 Izbornog zakona BiH).

#### **Član 2.** **(Učešće u dodjeli redovnog mandata – član 9.5 Izbornog zakona BiH)**

Politička stranka, koalicija, lista nezavisnih kandidata i nezavisni kandidat ne može učestvovati u raspodjeli mandata ako ne osvoji više od 3% od ukupnog broja važećih glasačkih listića u izornoj jedinici.

### **POGLAVLJE II. POSTUPAK ŽRIJEBANJA**

#### **Član 3.** **(Žrijebanje – član 9.8, 9.12 stav (3), 9.7, 11.7, 13.5, 13.14 stav (10) i stav (15) i 19.6 Izbornog zakona BiH)**

Žrijebanje se provodi ako je prilikom raspodjele mandata rezultat isti zbog identičnih količnika, kao i kod popune predstavničkih tijela gdje je obavezna raspodjela mandata iz konstitutivnih naroda i iz reda ostalih.

**Član 4.**  
**(Mjesto žrijebanja)**

- (1) Žrijebanje se provodi u prostorijama Centralne izborne komisije BiH.
- (2) Centralna izborna komisija BiH, po utvrđenom datumu žrijebanja, obavještava političke subjekte koji učestvuju u postupku žrijebanja o vremenu i mjestu gdje će se održati žrijebanje, najkasnije 24 sata prije održavanja žrijebanja.
- (3) Obavještavanje o žrijebanju vrši se telefonom ili faksom ili poštom ili elektronskom poštom.

**Član 5.**  
**(Lica)**

Žrijebanje obavljaju državni službenici iz Sekretarijata Centralne izborne komisije BiH, koje odredi Centralna izborna komisija BiH.

**Član 6.**  
**(Javnost žrijebanja)**

- (1) Žrijebanje je javno i mogu mu prisustvovati sva zainteresirana lica.
- (2) Centralna izborna komisija BiH javnost obavještava o vremenu i mjestu žrijebanja saopćenjem za javnost i putem svoje web stranice [www.izbori.ba](http://www.izbori.ba), najkasnije 24 sata prije održavanja žrijebanja.

**Član 7.**  
**(Postupak žrijebanja)**

- (1) Žrijebanje se provodi na jedan od sljedećih načina:
  - a) POLUAUTOMATSKO GENERISANJE
    - 1) službeno lice ili osoba koju odredi Centralna izborna komisija BiH će klikom na dugme pokrenuti pretraživanje baze političkih subjekata, odnosno kandidata, nakon čega će ista osoba, istekom određenog vremenskog perioda, klikom na dugme zaustaviti pretraživanje navedene baze, čime će se metodom slučajnog uzorka pojaviti ime političkog subjekta, odnosno ime kandidata sa automatski dodijeljenim rednim brojem koji odgovara redoslijedu izvlačenja, uz vizuelnu prezentaciju kompletnog postupka, ili

## b) MANUELNO GENERISANJE

- 1) listići s imenima kandidata s identičnim količnikom ubacuju se u identične neprozirne kuglice koje se potom stavljaju u providnu posudu za žrijebanje, nakon čega se pristupa njihovom izvlačenju i
- 2) službeno lice ili osoba koju odredi Centralna izborna komisija BiH prvo će rukom izmiješati sve plastične kuglice, a potom će izvući jednu plastičnu kuglicu s imenom političkog subjekta, odnosno kandidata s identičnim količnikom i naglas saopćiti ime političkog subjekta, odnosno kandidata koji je izvučen.

(2) Na navedeni način utvrdit će se koji je politički subjekt, odnosno kandidat s identičnim količnikom osvojio mandat.

(3) Postupak žrijebanja dodjele mandata identičan je i postupku žrijebanja za oduzimanje mandata, ako je za tu procesnu radnju potrebno izvršiti žrijebanje.

### **Član 8. (Zapisnik)**

O provedenom žrijebanju sastavlja se zapisnik u skladu s odredbama Zakona o upravnom postupku („Službeni glasnik BiH“, br. 29/02, 12/04, 93/09 i 41/13).

### **Član 9. (Audio i video snimanje)**

(1) Tok žrijebanja se snima audio i video tehnikom, što će se evidentirati u zapisniku o provedenom žrijebanju.

(2) U zapisnik se unosi ko je i u čije ime vršio audio i video snimanje i mjesto gdje će se nalaziti snimci s tog snimanja.

(3) Audio i video snimanje žrijebanja, audio i video dokumentacija o provedenom žrijebanju čuvat će se u Centralnoj izbornoj komisiji BiH zajedno sa zapisnikom o provedenom žrijebanju.

### **Član 10. (Prigovor)**

(1) U toku postupka žrijebanja, kao i po provedenom žrijebanju, nezadovoljna strana može izjaviti prigovor Centralnoj izbornoj komisiji BiH.

(2) Izjavljeni prigovor službeno lice unosi u zapisnik.

(3) O izjavljenom prigovoru odluku donosi Centralna izborna komisija BiH.

### **POGLAVLJE III. PRESTANAK MANDATA IZABRANOM ČLANU ORGANA VLASTI PRIJE ISTEKA VREMENA NA KOJE JE IZABRAN**

#### **Odjeljak A. Načini prestanka mandata**

##### **Član 11.**

##### **(Prestanak mandata – član 1.10 stav (1) Izbornog zakona BiH)**

Izabranom članu organa vlasti na svim nivoima vlasti u Bosni i Hercegovini prestaje mandat prije isteka vremena na koje je izabran na način kako je to definisano u članu 1.10 stav (1) Izbornog zakona BiH.

##### **Član 12.**

##### **(Obrazac za utvrđivanje prestanka mandata OB-1 – član 1.10 stav (3) Izbornog zakona BiH)**

(1) Centralna izborna komisija BiH utvrđuje izgled obrasca za utvrđivanje prestanka mandata izabranom članu organa vlasti OB-1.

(2) Obrazac iz stava (1) ovog člana čini sastavni dio ovog uputstva i sadrži sljedeće podatke:

- a) logo Centralne izborne komisije BiH,
- b) naziv i adresu organa, odnosno podnosioca zahtjeva/prijedloga,
- c) ime i adresu izabranog člana organa vlasti za kojeg se traži prestanak mandata, naziv političkog subjekta kojem pripada/čiji je član,
- d) dužnost izabranog člana organa vlasti za kojeg se traži prestanak mandata,
- e) razlog za utvrđivanje prestanka mandata izabranom članu organa vlasti, iz člana 16. Uputstva,
- f) prilog,
- g) potpis podnosioca zahtjeva/prijedloga,
- h) potpis i pečat predsjednika/predsjedavajućeg nadležnog zakonodavnog organa vlasti, i
- i) uputstvo za popunu obrasca.

##### **Član 13.**

##### **(Procedure za postupanje)**

(1) Izabrani član organa vlasti, kojem mandat dodjeljuje Centralna izborna komisija BiH u skladu sa Izbornim zakonom BiH, ostavku na mandat podnosi Centralnoj izbornoj komisiji BiH putem nadležnog zakonodavnog organa vlasti, na obrascu OB-1. Izabrani član organa vlasti u ostavci dužan je obrazac, čitko i u potpunosti, popuniti i osigurati da obrazac potpiše i predsjednik/predsjedavajući nadležnog organa vlasti, te da na obrazac stavi pečat.

(2) Ako je izabrani član organa vlasti, kojem mandat u skladu sa Izbornim zakonom BiH dodjeljuje Centralna izborna komisija BiH, opozvan, predsjednik/predsjedavajući nadležnog organa koji je proveo postupak opoziva dostavlja Centralnoj izbornoj komisiji BiH izvještaj komisije za provođenje postupka opoziva s kompletnim materijalom, radi provjere da li je postupak opoziva proveden u skladu sa Izbornim zakonom BiH.

(3) Ako izabranom članu organa vlasti, kojem mandat u skladu sa Izbornim zakonom BiH dodjeljuje Centralna izborna komisija BiH, mandat prestaje zbog smrti, predsjednik/predsjedavajući nadležnog organa vlasti, čitko i u potpunosti, popunjava obrazac OB-1, stavlja pečat, i sa Izvodom iz matične knjige umrlih dostavlja ga Centralnoj izbornoj komisiji BiH radi utvrđivanja prestanka mandata.

(4) Ako izabranom članu organa vlasti, kojem mandat u skladu sa Izbornim zakonom BiH dodjeljuje Centralna izborna komisija BiH, mandat prestaje zbog pravosnažne sudske presude kojom je osuđen na kaznu zatvora u trajanju od šest mjeseci ili duže, predsjednik/predsjedavajući nadležnog organa vlasti, odnosno Odsjek za izbore Centralne izborne komisije BiH, po saznanju za pravosnažnu osudu, čitko i u potpunosti, popunjava obrazac OB-1 i zajedno s pravosnažnom sudskom presudom dostavlja ga Centralnoj izbornoj komisiji BiH radi utvrđivanja prestanka mandata. Na obrascu OB-1 popunjenog od strane predsjednika/predsjedavajućeg nadležnog organa vlasti obavezno mora biti stavljen pečat.

(5) Ako izabranom članu organa vlasti, kojem mandat u skladu sa Izbornim zakonom BiH dodjeljuje Centralna izborna komisija BiH, mandat prestaje zbog pravosnažne sudske odluke kojom je lišen poslovne sposobnosti, Odsjek za izbore Centralne izborne komisije BiH, na osnovu službeno pribavljene dokumentacije, čitko i u potpunosti, popunjava obrazac OB-1 i zajedno s pravosnažnom sudskom odlukom dostavlja ga Centralnoj izbornoj komisiji BiH radi utvrđivanja prestanka mandata.

(6) Ako izabranom članu organa vlasti, kojem mandat u skladu sa Izbornim zakonom BiH dodjeljuje Centralna izborna komisija BiH, mandat prestaje zbog izbora ili imenovanja na funkciju čije je obavljanje nespojivo s funkcijom izabranog člana određenog organa, Odsjek za izbore Centralne izborne komisije BiH ili predsjednik/predsjedavajući nadležnog organa vlasti, na osnovu službene evidencije ili saznanja pribavljenih na drugi način, čitko i u potpunosti, popunjava obrazac OB-1, stavlja pečat nadležnog zakonodavnog organa i zajedno s aktom o izboru ili imenovanju dostavlja ga Centralnoj izbornoj komisiji BiH radi utvrđivanja prestanka mandata.

(7) Ako izabranom članu organa vlasti, kojem mandat u skladu sa Izbornim zakonom BiH dodjeljuje Centralna izborna komisija BiH, mandat prestaje zbog odjave prebivališta s područja izborne jedinice u kojoj je upisan u Centralni birački spisak da glasa i u kojoj je izabran, istekom roka od šest mjeseci od dana odjave prebivališta, Odsjek za izbore Centralne izborne komisije BiH, na osnovu službene evidencije, čitko i u potpunosti, popunjava obrazac OB-1 i zajedno s odjavom prebivališta izabranog člana organa vlasti, dostavlja Centralnoj izbornoj komisiji BiH radi utvrđivanja prestanka mandata.

(8) Ako izabranom članu organa vlasti, kojem mandat u skladu sa Izbornim zakonom BiH dodjeljuje Centralna izborna komisija BiH, mandat prestaje zbog gubitka prava da bude biran iz razloga utvrđenih zakonom, Odsjek za izbore Centralne izborne komisije BiH, na osnovu službenih evidencija, čitko i u potpunosti, popunjava obrazac OB-1 i zajedno s pravosnažnim aktom o utvrđivanju gubitka prava izabranog člana organa vlasti da bude biran dostavlja Centralnoj izbornoj komisiji BiH radi utvrđivanja prestanka mandata.

(9) U ostalim slučajevima podnošenja ostavke izabrani član organa vlasti, kojem mandat dodjeljuje Centralna izborna komisija BiH u skladu sa Izbornim zakonom BiH, ostavku može podnijeti Centralnoj izbornoj komisiji BiH ili nadležnom organu, koji je dužan obavijestiti Centralnu izbornu komisiju BiH o podnesenoj ostavci.

## **Odjeljak B. Postupak utvrđivanja prestanka mandata**

### **Član 14.**

#### **(Odluka – član 2.9 stav (1) tačka 14. Izbornog zakona BiH)**

(1) Centralna izborna komisija BiH donosi odluku o prestanku mandata izabranog člana organa vlasti na svim nivoima neposrednih i posrednih izbora u Bosni i Hercegovini, obuhvaćenih Izbornim zakonom BiH, te vodi i prethodni postupak, ako je potrebno, o utvrđivanju činjeničnog stanja (u slučaju kada je izabrani zvaničnik podnio ostavku, da je to učinio svojom voljom).

(2) Ovlašteno lice iz Sekretarijata Centralne izborne komisije BiH utvrdit će putem telefonskog razgovora s izabranim članom organa vlasti svojevrijnost podnesene ostavke i o tome sačiniti službenu zabilješku.

(3) Centralna izborna komisija BiH donosi odluku o prestanku mandata izabranom članu organa vlasti i dodjeli mandata sljedećem kvalificiranom kandidatu sa liste iste političke stranke u roku koji ne može biti duži od 15 dana od dana kada su nastupili razlozi za prestanak mandata, odnosno od saznanja o razlogu za prestanak mandata i o tome obavještava izabranog člana organa vlasti kojem prestaje mandat.

(4) Prije nego što dodijeli mandat sljedećem kvalificiranom kandidatu, Centralna izborna komisija BiH provjerava kod Apelacionog odjela Suda BiH da li je nezadovoljna strana u roku od dva dana od dana prijema odluke podnijela žalbu na odluku Centralne izborne komisije BiH o prestanku mandata izabranom članu organa vlasti i dodjeli mandata sljedećem kvalificiranom kandidatu sa liste, osim u slučaju kada je mandat izabranom članu organa vlasti prije isteka vremena na koje je izabran prestao u skladu s odredbom člana 1.10 tačka 1. i tačka 3. Izbornog zakona BiH.

(5) U slučaju prestanka mandata izabranom članu organa vlasti opozivom, Centralna izborna komisija BiH provjerava odluku nadležnog organa o prestanku mandata, kako bi se osiguralo da je mandat izabranog zvaničnika prestao u skladu sa Izbornim zakonom BiH.

### **Član 15.**

#### **(Dodjela mandata i Uvjerenje o dodjeli – član 9.10 i 2.9 stav (1) tačka 10. Izbornog zakona BiH)**

(1) Nakon pravosnažnosti odluke Centralne izborne komisije BiH o prestanku mandata izabranog člana organa vlasti, Centralna izborna komisija BiH će, u skladu s čl. 9.10, 9.12h, 10.8, 10.17, 11.8 i 11.14, odnosno 13.6 Izbornog zakona BiH, izvršiti dodjelu mandata sljedećem kandidatu i izdati Uvjerenje o dodijeljenom mandatu, u skladu s članom 2.9 stav (1) tačka 10. Izbornog zakona BiH.

(2) Prije uručenja Uvjerenja o dodjeli mandata, kvalificirani kandidat će, na obrascu koji propisuje Centralna izborna komisija BiH, potpisati izjavu kojom prihvata ili odbija mandat i dostaviti je Centralnoj izbornoj komisiji BiH u roku od 7 dana. Ako prihvati mandat, Centralna izborna komisija BiH dodijelit će mandat kvalificiranom kandidatu koji je dužan, na obrascu koji propisuje Centralna izborna komisija BiH, potpisati potvrdu o prijemu Uvjerenja o dodjeli mandata koju će u roku od tri dana dostaviti Centralnoj izbornoj komisiji BiH. Centralna izborna komisija BiH će, nakon što izvrši dodjelu mandata, kopiju Uvjerenja i pravosnažnu odluku o prestanku mandata izabranom članu organa vlasti i dodjeli mandata sljedećem kvalificiranom kandidatu sa liste dostaviti organu u kojem je kvalificirani kandidat dobio mandat.

(3) U smislu dokaza o prijemu Uvjerenja o dodjeli mandata iz stava (2) ovog člana, smatrat će se i dokaz o prijemu preporučene pošte.

**Član 16.**  
**(Početak trajanja mandata)**

Članu organa vlasti kojem je dodijeljen mandat, umjesto člana organa vlasti kojem je prestao mandat u skladu s članom 1.10 Izbornog zakona BiH, mandat počinje teći danom potpisivanja izjave o prihvatanju mandata.

**POGLAVLJE IV. PRELAZNE I ZAVRŠNE ODREDBE**

**Član 17.**  
**(Sastavni dio ovog uputstva)**

Sastavni dio ovog uputstva su:

- a) Obrazac OB-1 iz člana 15. stav (1) ovog uputstva;
- b) Obrazac Izjave o prihvatanju ili odbijanju mandata i
- c) Obrazac potvrde o prijemu Uvjerenju o dodjeli mandata.

**Član 18.**  
**(Prestanak primjene)**

Stupanjem na snagu ovog uputstva prestaje da važi Uputstvo o dodjeli i prestanku mandata („Službeni glasnik BiH”, br. 37/10, 71/10, 2/11 i 43/11).

**Član 19.**  
**(Stupanje na snagu i objavljivanje u službenim glasilima)**

Ovo uputstvo stupa na snagu narednog dana od dana objavljivanja u „Službenom glasniku BiH“, a objavit će se u „Službenim novinama FBiH“, „Službenom glasniku RS“, „Službenom glasniku Brčko distrikta BiH“ i web stranici Centralne izborne komisije BiH [www.izbori.ba](http://www.izbori.ba).

Broj:05-1-02-2-450-1/14  
Sarajevo, 29.04.2014. godine

